

UNESCO – 09.06.2018

Wat ass eigentlech genee UNESCO?

Wat hunn d'lechternacher Sprangprëssessioun, Pizza an Akupunktur gemeinsam? All dës Saache gëllen als immateriell Kulturierwe vun der Mënschheet – festgeluecht vun der UNESCO.

D'UNESCO ass d'Organisatioun fir Bildung, Wëssenschaft a Kultur vun der UNO. Et ass eng international, selbststänneg Organisatioun vun de Vereenten Natiounen, déi 1945 gegrënnt gouf. (Zu der UN, bzw. de Vereenten Natiounen, gëtt et och ee Podcast.)

Am Moment huet d'UNESCO 195 Memberlänner an hier Büro sinn zu Paräis. Dës Organisatioun huet als Aufgab, Fridden opzebauen, andeems d'Memberlänner an der Bildung, Wëssenschaft a Kultur zesummeschaffen. Zil ass also en Austausch tëschent verschiddene Länner op der ganzer Welt.

Nom Zweete Weltkrich war kloer, dass Fridden op laang Dauer net nëmmen duerch politesch a wirtschaftlech Ofmaachungen tëscht Regierungen bestoe kéint. Villméi misst de Fridden och duerch gescheit a moralesch Solidaritéit gesécher ginn.

„Vu, dass Krich am Geescht vu Mënschen entsteet, muss och de Fridden am Geescht vun de Mënsche verankert ginn.“ (Sou ee vun de Grondsätz). Dofir setzt sech d'UNESCO sech an 3 grouse Beräicher an: Kultur, Bildung a Wëssenschaft.

Eng wichteg Fro mat där sech d'UNESCO beschäftegt ass: Wat soll fir d'Zukunft erhalen ginn? Dofir gëtt et z.B. ee Comité, deen entscheet, wéi eng Gebaier, Naturmonument oder Konscht an aner Kulturgidder, Weltkulturierwe sinn. Et ginn och bestëmmte Regeln, wéi déi Kulturierwe kënnen geschützt ginn. Op dës Manéier gëtt kulturell Vielfalt an den Dialog tëscht de verschiddene Kulture gestärkt.

Zanter 1994 gehéiert d'Alstad Lëtzebuerg zum Beispill zum UNESCO Weltkulturierwen. Mee och aner Kulturierwe wéi d'Ausstellung *The Family of Man* zu Klierf am Schlass an d'lechternacher Sprangprëssessioun si vun der UNESCO geschützt.

D'UNESCO setzt sech ausserdeem fir „Bildung fir jiddereen“ an. Si këmmert sech ëm d'Ëmsetzung vun Ziler, déi d'Memberlänner festleeën a kontrolléiert Bildungsstandarden op der ganzer Welt. Zil ass et, Mënschen ouni Zougank zu Schoulen ee Wee fir Bildung ze erméiglechen.

D'UNESCO kuckt och, dass Fuerscher a Fuerscherinne méi zesummeschaffen. Si engagéiert sech zum Beispill bei der Beobachtung vun de Mierer, der Fuerschung zu Nohaltegkeet an dem Erhale vu Waasserressourcen oder och Verännerungen an der Gesellschaft.

Dat ass awer net alles! D'UNESCO mécht sech och fir Pressefräiheet staark a gesäit Kommunikatioun an Informatiounsfräiheet als ee wichtige Bestanddeel vun enger méi friddlecher Welt.

POLITIKLEXIKON



All dës Aarbecht kascht natierlech och. Ongeféier d'Halschent vun de Suen, fir hir Projeten ze finanzéieren, kritt d'UNESCO aus de Bäitrag, déi Memberstaate bezuelen. Si huet fir 2018 an 2019 e Budget vun 1,2 Milliarden Dollar.